

Dumonda da fracziun da l'Allianza dal Center concernent l'iniziativa dal pievel «Per l'avegnir da nossa natira e da nossa cuntrada (Iniziativa da la biodiversitad)» (emprima sutsegnadra Messmer-Blumer)

Il 22 da settember 2024 vegn il suveran svizzer a votar davart l'iniziativa dal pievel «Per l'avegnir da nossa natira e da nossa cuntrada».

Il Grischun è enconuscent per sia cuntrada multifara e dumbra blers territoris protegids e spazis da viver natirals. Igl è dentant impurtant da menziunar, che surfatschas da biodiversitad na vegnan betg protegidas sulettain cun determinar formalmain territoris protegids, mabain er cun mesiras sco l'utilisaziun dal terren persistenta e la protecziun da la cuntrada. L'agricultura grischuna metta a disposiziun gia oz ina gronda cumpart da las surfatschas da biodiversitad. Per il futur stuain nus far atenziun da nizzegiar las resursas existentas da l'agricultura muntagnarda e da producir vinavant en quest sector. Rinforzar la producziun da victualias indigenas e promover uschia la valurizaziun en nossas valladas, è la dretga via tenor l'opiniun da la fracziun da l'Allianza dal Center.

Ultra dals aspects che dattan il num a la «Iniziativa da la biodiversitad» vai per ina gronda part er per la protecziun da la patria e da la cuntrada. L'iniziativa pretenda d'obligar explicitamain ils chantuns da proteger e schanegiar las cuntradas, ils maletgs dals vitgs ed ils lieus istorics. Quai po engrevgiar supplementarmain la situaziun precara gia existenta da la stgarsezza d'abitaziuns en nossas vischnancas e vals. Er per l'agricultura vegni – cun ulteriuras leschas e prescripziuns – grev da satisfar als princips economics ed al bainstar dals animals. Ed er utilisaziuns per projects turistics e lur realisaziun ston restar pussaivlas vinavant.

La formulaziun d'interpretaziun dal text da l'iniziativa «Il cuntegn essenzial da las valurs da protecziun sto vegnir mantegnì senza restricziuns» impedescha in'amplificaziun da las energias regenerablas en las regiuns pertutgadas. Nus temain che l'utilisaziun d'energia idraulica, solara e dal vent vegnia restrenschiada fermamain en cas che l'iniziativa vegniss acceptada.

Sut l'aspect da questas explicaziuns drizzan las sutsegnadras ed ils sutsegnaders las suandantas dumondas a la Regenza:

1. Tge consequenzas vesa la Regenza per l'urbarisaziun decentrala en nossas valladas, en cas che questa iniziativa vegniss acceptada?
2. È er la Regenza da l'avis da las sutsegnadras e dals sutsegnaders, che l'agricultura muntagnarda grischuna duess avair en mira ina interacziun persistenta tranter biodiversitad e producziun?
3. Vesa la Regenza il privel che l'amplificaziun necessaria d'energias regenerablas en il rom planisà fiss periclitada en cas che l'iniziativa vegniss acceptada?
4. Co giuditgescha la Regenza il mantegniment e l'amplificaziun d'infrastructuras liadas al lieu (sco telefericas e.u.v.) en connex cun questa iniziativa?

Cuira, ils 23 d'avrigl 2024

Messmer-Blumer, Michael (Donat), Beeli, Bergamin, Bettinaglio, Binkert, Brunold, Caluori (Panaduz), Cathomas, Collenberg, Danuser (Cazas), Decurtins, Derungs (Lumbrein), Epp, Federspiel, Föhn, Furger, Gansner, Haltiner, Kohler, Loepfe, Maissen, Mani, Righetti, Said Bucher, Sax, Schneider, Sigron, Spagnolatti, Tanner, Ulber, Zanetti (Sent), Zanetti (Landquart)